

- राज्य सरकार तबादलां माथे रोक हटायी- शिक्षा विभाग रे अलावा दूजा महकमा मांय एक ऊं दस जनवरी 2025 ताई तबादला व्हे सकेला।
- माली साल 2024-25 रा बजट मांय करी ज्या ऐलाण ऊं जुड्या काम करावण रा बारा मांय मुख्यमंत्री भजनलाल शर्मा संभागवार विधायकां सागे मीटिंग कर रह्या है।
- राज्य मांय खनिजां री खोज रा काम रो पांच साल रो मास्टर प्लान बणायो जावेला।
- प्रदेश मांय केई ठोडां घणी धुंअर-सीळा बायरा ऊं गळन बधी।

000

प्रदेश मांय सरकारी कर्मचारियां रा तबादला माथे लाग्योडी रोक एक जनवरी ऊं 10 जनवरी 2025 ताई हटा दीरीजी है, हालांकि स्कूल शिक्षा विभाग, उच्च शिक्षा, कॉलेज शिक्षा विभाग अर तकनीकी शिक्षा विभाग रा कर्मचारियां सारू तबादला माथे रोक जारी रहवेला, जदके वोटर लिस्टां रा संक्षिप्त पुनरीक्षण रा काम मांय लाग्योडा कर्मचारियां रा तबादला माथे ई 07 जनवरी 2025 ताई रोक रेहवेला। प्रशासनिक सुधार अर समन्वय विभाग ई बारा मांय हुकम जारी कर दीनो है। ओ हुकम राज्य रा सगळा निगमां, मण्डलां, बोर्ड अर स्वायत्तशासी संस्थावां माथे ई लागू व्हेला।

000

मुख्यमंत्री भजन लाल शर्मा माली साल 2024-25 रा बजट मांय करी ज्या ऐलाण ऊं जुड्या काम करावण रा बारा मांय संभागवार विधायकां सागे मीटिंग कर रह्या है। वे आज अजमेर, बीकानेर अर जयपुर रा विधायकां सागे बातचीत कीनी। ई दौरान विधायक आप-आप रा हलका मांय लारला एक साल मांय करायी ज्या कामां रो लेखो-जोखो मुख्यमंत्री सामी पेश कीनो।

000

केन्द्रीय वित्तमंत्री निर्मला सीतारामन आज नई दिल्ली मांय बजट ऊं पैली चर्चा सारू राख्यी ज्यी मीटिंग री सदरत कीनी। आम बजट-2025-26 रा बारा मांय विचार करण सारू आ पांचवीं मीटिंग ही। इण मांय वित्त, निवेश अर सार्वजनिक परिसम्पत्ति प्रबंधन समेत केई महकमां रा सचिव अर केन्द्र सरकार रा मुख्य आर्थिक सलाहकार ई शिरकत कीनी। माली साल 2025-26 रो केन्द्रीय बजट आवता साल पहली फरवरी ने संसद मांय पेश कर्यो जावण रा आसार है।

000

लोकसभा अध्यक्ष ओम बिरला आज बूंदी मांय राजस्थान पेंशनर्स समाज रा सालाना जळसा मांय शिरकत कीनी। ई मौके वे प्रदेश रा विकास मांय पेंशनरां रा योगदान री सराहवणा कीनी।

000

राज्य मांय खनिजां री खोज रा काम रो पांच साल रो मास्टर प्लान बणायो जावेला। राजस्थान स्टेट मिनरल एक्सप्लोरेशन ट्रस्ट री आज जयपुर मांय राख्यी ज्यी मीटिंग मांय आ जाणकारी दीरीजी। खनिज विभाग रा प्रमुख शासन सचिव टी. रविकान्त बतायो के खनिजां री उपलब्धता री टेमसर ठा पडबा ऊं खनिज ब्लॉकां री टेम परां कारगर तरीका ऊं नीलामी व्हे सकेला। रविकांत बतायो के इण ऊं नौकरी-धंधा अर सरकारी आमदनी रा मौका बधेला।

000

राज्यपाल हरिभाऊ बागडे विद्यार्थियों का किताबी ज्ञान सागे दिमागी बूतों बधावण बाबत लगातार कोशिश करण सारू कह्यो है। वे आज भरतपुर मांय अखिल भारतीय विद्यार्थी परिषद रा 60वां प्रांत अधिवेशन रा उद्घाटन जळसा मांय बोल रह्या हा। राज्यपाल कह्यो के विद्यार्थियों ने किताबां रा ज्ञान या सर्टिफिकेट अर डिग्री रे भरोसे नी रेहवणो चाहिजे, बल्कि व्यवहारिक गुणां सागे आगे बढणा चाहिजे।

राज्यपाल बागडे आज जयपुर मांय "सरस राजसखी राष्ट्रीय मेळो ई देख्यो। ई दौरान वे देशभर कां आई महिला स्वयं सहायता समूहां री सदस्यां सागे बातचीत ई कीनी।

000

पाली रा जिला कलेक्टर एल.एन.मंत्री आज शिक्षा विभाग रा अहलकारां सागे मीटिंग कर र वां ने स्कूलां मांय बच्चां ने खुल्या बोरवेल अर ट्यूबवेल रे कारण व्हेवण वाळा हादसां रा बारा मांय जाणकारी देवण रा हुकम दीना। वे सार्वजनिक निर्माण विभाग रा अहलकारां ने देसूरी री नाल मांय हिफाजत सारू भीत बणावण अर ब्लैक स्पॉट माथे सावचेती राखण रा बोर्ड लगावण रा हुकम ई दीना।

000

प्रधानमंत्री नरेन्द्र मोदी रा परीक्षा पे चर्चा कार्यक्रम री तैयारियां रा बारा मांय आज स्कूल शिक्षा विभाग रा शासन सचिव कृष्ण कुणाल अहलकारां री मीटिंग लीनी। मीटिंग मांय कुणाल सगळी स्कूलां मांय ई कार्यक्रम रो सीधो प्रसारण तैय करण रा हुकम दीना। वे बतायो के विद्यार्थी अर वां रा मायत नाम मंडावण सारू 14 जनवरी तांई ऑनलाइन तरीका कां अर्जी दे सके है।

000

प्रदेश मांय आज सवाईमाधोपुर, दौसा अर झालावाड़ समेत केई ठोडां घणो कोहरो रह्यो। सीळो बायरो ई ठण्ड रो असर बधा दीनो है, हालांकि मावठ पाछे कठे-कठे आज तावड़ो निकळ्यो। आज माउंट आबू मांय न्यूनतम तापमान 1 डिग्री सेल्सियस दर्ज करी ज्यो, जदके सिरोही मांय कम-ती-कम तापमान 5 दशमलव 2 डिग्री सेल्सियस रह्यो। जैसलमेर, उदयपुर, चित्तौड़गढ़, सीकर, अजमेर अर भीलवाड़ा मांय ई जोरदार सर्दी पड़ रही है। भरतपुर मांय ई तेज ठंड अर धुंअर रे कारण जिन्दगी माथे असर पड़ रह्यो है। पाळो पड़बा रा आसार ने ध्यान राखता थकां कृषि विभाग किसानां ने साखां मांय हल्की पाणत करण अर मेड़ां माथे धुंओ करण री राय दीनी है। पशुपालन विभाग ई सिंयाळा मांय ढांढा-ढोरां ने खुला मांय नी बांधण अर चारा-पाणी रो ज़रूरी प्रबंध करण री राय दीनी है।

000

साल 2024 ने अलविदा कहवण अर नुवा साल री अगवानी सारू प्रदेश मांय तैयारियां जोरां कां चाल रही है। मोटी तादाद मांय देशी-परदेशी सैलानी ई नुवा साल रो जश्न मनावण सारू प्रदेश मांय सैर-सपाटा री न्यारी-न्यारी ठोडां पूग रह्या है। माउंट आबू, रणथम्भौर, जैसलमेर, भरतपुर, उदयपुर, जोधपुर अर राजधानी जयपुर मांय मोटी तादाद मांय सैलाणी पूग रह्या है। मशहूर सांभर झील माथे प्रवासी परिन्दां ने निरख र लोग सर्दी री छुट्टियां रो मजो ले रह्या है। जयसमंद झील अर महाराणा प्रताप रे देवलोक व्हेवण री ठोड़ चावंड मांय ई मोटी तादाद मांय लोग पूग रह्या है। सैलानियां री मोटी तादाद ने ध्यान राखता थकां प्रशासन ई ज़रूरी तैयारियां कीनी है। पुरातत्व अर संग्रहालय विभाग रा निदेशक, डॉ. पंकज धरेन्द्र बतायो के सैलानियां रा सुबीता सारू तकनीक री मदद कां केई नवाचार करी ज्या है।

मोटी तादाद मांय सैलाणी आवण कां कारोबारियां मांय ई उमाव है।

000

साल 2024 प्रदेश सारू केई मायनां मांय खास रह्यो। एक ओर जठे उनाळा मांय जोरदार तावड़ो पड़्यो, तो चौमासा मांय जोरदार मेह बरस्यो। आं दिनां पड़ रही हाड़ कंपा देवण वाळी ठण्ड बीचे नुवा साल रा स्वागत री तैयारियां चाल रही है।

000